



Број/Број: 01/4-50-1-4-44/09
Сарајево/Sarajevo, 17.4.2009. godine

ZAPISNIK

44. sjednice Komisije za finansije i budžet Predstavničkog doma Parlamentarne skupštine BiH,

održane 14.4.2009., u vremenu od 13 do 15 sati

Sjednici Komisije prisustvovali su članovi: Sadik Bahtić, Lazar Prodanović, Velimir Jukić, Adem Huskić, Bajazit Jašarević, Salko Sokolović, Savo Erić i Drago Kalabić.

Sjednici nije prisustvovao Zlatko Lagumdžija, član Komisije.

Sjednici su također prisustvovali: Kemal Kozarić, guverner Centralne banke BiH, Vlatko Dugandžić, pomoćnik ministra za budžet, Ranko Šakota, pomoćnik ministra za trezor, i Vera Letica, pomoćnik ministra finansija i trezora BiH, Zorica Kazić, savjetnik za ekonomske poslove u Savezu samostalnih sindikata BiH, Zoran Brkić, viši stručni saradnik u Sektoru za odnose s javnošću Sekretarijata PSBiH, te Željko Kosmajac, sekretar, i Muhameda Abaz, stručni saradnik pri Komisiji.

Od predstavnika medija sjednici su prisustvovali: Aida Salčinović-TV FBiH i Bahreta Rožajac-„Dnevni avaz“.

Za sjednicu je predložen sljedeći

DNEVNI RED

1. Usvajanje Zapisnika 42. sjednice Komisije;
2. Razmatranje Prijedloga zakona o javnim nabavkama, druga komisijska faza (predlagač: Vijeće ministara BiH);
3. Razmatranje Prijedloga zakona o izmjenama i dopunama Zakona o finansiranju institucija BiH, druga komisijska faza (predlagač: Vijeće ministara BiH);
4. Razmatranje Godišnjeg izvještaja Centralne banke BiH za 2008. godinu (sačinilac: CBViH);
5. Razmatranje Finansijskih izvještaja Centralne banke BiH za 2008. godinu (sačinilac: CBViH);
6. Tekuća pitanja:
 - Incijativa Saveza samostalnih sindikata BiH za donošenje odluke koja ima za cilj smanjenje troškova ukupne javne potrošnje i uvođenje štednje na svim nivoima vlasti u BiH, zaprimljena 12.3.2009.

Prije usvajanja predloženog dnevnog reda, **predsjedavajući Komisije** informirao je prisutne da je rukovodstvo Komisije, prije početka 44. sjednice, održalo zajednički sastanak s članovima Kolegija Predstavničkog doma, te rukovodiocima Agencije za javne nabavke BiH i Ureda za razmatranje žalbi. Na sastanku Kolegij Doma produžio je ranije određen rok za dostavljanje komisijskog izvještaja o Prijedlogu zakona o javnim nabavkama do 24.4.2009., te zadužio nadležne institucije

BiH za oblast javnih nabavki da približe svoje različite stavove, koji bi bili predmet razmatranja na ponovnom zajedničkom sastanku Komisije s članovima Kolegija, kao i sporni amandmani I. i II. poslanika Živkovića i Kalabića. Iz navedenog razloga predsjedavajući Komisije zatražio je skidanje tačke 2. s dnevnog reda ove sjednice.

Lazar Prodanović naveo je da je saglasan sa skidanjem tačke 2. s dnevnog reda sjednice, te sugerirao da bi poslanik Huskić, kao podnosilac amandmana na Prijedlog zakona, trebalo da prisustvuje njihovom usaglašavanju između Agencije za javne nabavke BiH i Ureda za razmatranje žalbi. Razlog zato je što je, 9.4.2009., održan radni sastanak grupe u kojoj su bili predstavnici rukovodstva Komisije, podnosioca amandmana, Ministarstva finansija i trezora BiH, te rukovodioca Agencije za javne nabavke BiH i Ureda za razmatranje žalbi, na kojem je postignuta saglasnost o do tada dostavljenim amandmanima s izuzetkom amandmana I i II poslanika Živkovića i Kalabića, o kojima je potrebno postići politički konsenzus.

Predložena izmjena za skidanje 2. tačke dnevnog reda sjednice jednoglasno je usvojena, kao i sljedeći dnevni red:

1. Usvajanje Zapisnika 42. sjednice Komisije;
2. Razmatranje Prijedloga zakona o izmjenama i dopunama Zakona o finansiranju institucija BiH, druga komisijska faza (predlagač: Vijeće ministara BiH);
3. Razmatranje Godišnjeg izvještaja Centralne banke BiH za 2008. godinu (sačinilac: CBBiH);
4. Razmatranje Finansijskih izvještaja Centralne banke BiH za 2008. godinu (sačinilac: CBBiH);
5. Tekuća pitanja:
 - Incijativa Saveza samostalnih sindikata BiH za donošenje odluke koja ima za cilj smanjenje troškova ukupne javne potrošnje i uvođenje štednje na svim nivoima vlasti u BiH, zaprimljena 12.3.2009.

Ad.1. Usvajanje Zapisnika 42. sjednice Komisije

Zapisnik 42. sjednice Komisije usvojen je jednoglasno, bez primjedbi.

Ad. 2. Razmatranje Prijedloga zakona o izmjenama i dopunama Zakona o finansiranju institucija BiH, druga komisijska faza (predlagač: Vijeće ministara BiH)

II. komisijska faza

Predsjedavajući Komisije naveo je da je, u amandmanskom roku, na Prijedlog zakona o izmjenama i dopunama Zakona o finansiranju institucija BiH podnesen samo jedan amandman poslanika Sefera Halilovića.

Vlatko Dugandžić, pomoćnik ministra za budžet u Ministarstvu finansija i trezora BiH, istakao je da, sa stanovišta nadležnog ministarstva, predloženi amandman nije prihvatljiv.

Izjašnjavanje o amandmanu i Prijedlogu zakona u cjelini

Nakon kraće rasprave i glasanja, **predsjedavajući** je konstatirao da je Komisija jednoglasno odbacila Amandman I. poslanika Sefera Halilovića, a zatim jednoglasno usvojila Prijedlog zakona o izmjenama i dopunama Zakona o finansiranju institucija BiH u drugoj komisijskoj fazi, čije je usvajanje predložila Predstavničkom domu.

Ad.3. Razmatranje Godišnjeg izvještaja Centralne banke BiH za 2008. godinu

Ad.4. Razmatranje Finansijskih izvještaja Centralne banke BiH za 2008. godinu

Predsjedavajući Komisije predložio je da se rasprava o ove dvije tačke dnevnog reda provede zajedno. U uvodu ovim tačkama dnevnog reda naveo je da su izvještaji Centralne banke BiH sveobuhvatni, te da bi Vijeće ministara BiH, na osnovu njihove analize, trebalo voditi svoju politiku. Pohvalio je poslovanje CBBiH u 2008. godini, kao i njihovo istupanje u medijima, zahvaljujući kojem su zadržali pozitivan rejting ove institucije i povjerenje građana. U vrijeme

recesije, CBBiH je jedina institucija koja je preduzela dvije mjere: smanjila je rezerve i povećala depozit, nastojeći time zadržati povjerenje građana u bankarstvo. Izvještaji CBBiH za 2008. sadržavaju i pozitivne i negativne pokazatelje navodeći da je profit CBBiH u 2008. iznosio oko 199,4 miliona KM, rezerve-6,3 milijarde KM, vanjski dug-4,2 milijarde KM, vanjskotrgovinski deficit-9,6 milijardi KM, stopa rasta GDP bila je oko 5,5%, dok je za 2007. godinu iznosila 6%.

Kemal Kozarić, guverner CBBiH, naveo je da je u 2008. godini CBBiH najuspješnije poslovala, te da je u trećem kvartalu te godine počeo već da se osjeća uticaj finansijske krize u svijetu. Najstojeći da bankarski sektor zadrži likvidnim, CBBiH preduzela je određene mjere. Depozit u iznosu od 700 miliona KM povučen je iz banaka, a preduzimanjem mjera, 110 miliona je opet vraćeno u depozit bankama. Od makroekonomskih pokazatelja naveo je da je DBP iznosio 25 milijardi, odnosno 5,5 %, inflacija je u decembru bila 3,8%, a sredinom 2008. 9,9 % što predstavlja uticaj cijena hrane i nafte, sada inflacija iznosi 1,8 %, deficit je iznosio 13,4% BDP, a nezaposlenost 23,4% DBP, što su zapravo dva najveća problema BiH. Prosječna plaća u BiH iznosila je 752 KM. Izvještaji CBBiH za 2008. su sveobuhvatni, te prikazuju realni, bankarski i ukupni finansijski sektor u BiH. U skladu sa zakonskom odredbom, CBBiH je dio dobiti od oko 120 miliona KM transferirala državnom budžetu.

CBBiH je kroz „valutni odbor“ uspjela održati monetarnu stabilnost. Rezerve su također stabilne. Njihov ukupan iznos od 6 milijardi KM umanjen je svjesno u dva navrata za oko 300 miliona KM i postoji vjerovatnoća za još jedno umanjeње rezerve, s ciljem oslobađanja sredstava bankama za kreditiranje privrede i građana. U bankarskom sektoru istakao je da nijedna banka nije postala nesolventna. Evidentno je reduciranje kreditne aktivnosti banaka i blagi porast kamatnih stopa. CBBiH nema instrumente da ograniči visinu kamatnih stopa, ali apelira i mjerama motivira banke da kamatne stope svedu u realne okvire. Pojasnio je da je bankama dotok kapitala izvana presječen, te da su se one koncentrirale na domaće izvore. Pasivne kamatne stope iznose 7 ili 8% i samim ti projiciraju rast aktivnih kamatnih stopa. CBBiH nastojat će ograničiti pasivnu kamatnu stopu, kako bi se navedeni rast aktivnih kamatnih stopa kod banaka zaustavio.

Nakon guvernerovog obrazlaganja navedenih izvještaja CBBiH, predsjedavajući Komisije otvorio je raspravu, koja se odvijala na principu pitanje-odgovor i u kojoj su učestvovali: Sadik Bahtić, Lazar Prodanović, Velimir Jukić, Adem Huskić, Bajazit Jašarević, Savo Erić, te guverner CBBiH.

U smislu povećanih kamatnih stopa kod komercijalnih banaka u BiH, **Adem Huskić** upitao je guvernera da li Komisija može kroz iniciranje određenih zakonskih izmjena nenarušavajući položaj Centralne banke BiH omogućiti privredi dobivanje sredstava po što povoljnijim uslovima.

Lazar Prodanović pitao je guvernera da li CBBiH predviđa i kakve je mjere osiguranja moguće preduzeti kako komercijalne banke BiH, u slučaju nastupanja problema, ne bi povukle svoje depozite u matične zemlje.

Bajazit Jašarević pitao je guvernera da li su banke kod kojih se nalaze rezerve BiH ubuhvaćene finansijskom krizom. Da li će se povjerenje štedišama uzvraćati daljnjim dizanjem granice osiguranja depozita? Da li će se naći način, zajedno u saradnji s Vijećem ministara BiH, za obeštećenje starih deviznih štediša? S obzirom da trenutna situacija ne odgovara privatizaciji, da li vrijednosni papiri mogu nadomjestiti emitiranje državnih dionica?

Savo Erić pohvalio je izvještaje CBBiH, te izrazio zadovoljstvo radom CBBiH na procjeni rizika, te odabiru banaka za deponovanje rezervi BiH. Upitao je guvernera da li CBBiH predviđa uzimanje pozajmica od MMF-a, šta je sa inflacijom u 2009. godini, kako se mogu osigurati hipoteke firmi i privrede, koje pune budžete u BiH, da li postoji neka rezervna mjera u smislu smanjivanja rezervi preko banaka ili vladinih institucija ili eventualno prijedlog pomoći zapošljavanju, socijalnim krizama, te da li se očekuje novi val krize u maju ove godine.

Predsjedavajući Komisije naveo je da je evidentan problem mnogih firmi u BiH dobivanje kreditnih sredstava, te da su Prijedlog zakona o garancijskom fondu i Prijedlog zakona o finansijskom lizingu bili idealno rješenje za novonastalu situaciju u BiH da su naišli na razumijevanje parlamentarne većine.

Velimir Jukić naveo je informaciju da kamatne stope u Srbiji padaju, dok u BiH rastu, te postavio pitanje šta je razlog i šta treba preduzeti? Istakao je da je MMF dobio najvažniju ulogu u historiji svog postojanja. Pitao je guvernera da li vlasti BiH mogu uticati na politiku i projekciju profita komercijalnih banaka, da li je porast profita CBBiH u 2008. godine dobar ili loš pokazatelj, te da li CBBiH planira zadržati rezerve na 14% u 2009. godini?

Kemal Kozarić, guverner CB BiH odgovorio je da se kamatne stope u BiH formiraju slobodno pod uticajem ponude i potražnje. CBBiH nema mogućnost da tretira komercijalne banke, jer joj je to zabranjeno. Spomenuo je da bi korektivni faktor u BiH kroz plasiranje svojih sredstava u privredu trebalo da budu razvojne banke, koje nisu odigrale tu ulogu, mada se ona od njih očekivala. CBBiH planira preduzeti set mjera, kojim bi obaveznu rezervu još jednom umanjila, a kojim tretira i razvojne banke. Set mjera čine: smanjenje obavezne rezerve za dugoročne i kratkoročne izvore, oslobodjenje sredstava razvojnih banaka iz obavezne rezerve te uzimanje deviza u osnovicu za obračun rezerve od strane komercijalnih banaka.

Istakao je da je učešće stranog kapitala u vlasništvu domaćih komercijalnih banaka u iznosu od 84%, te da je zabrinutost poslanika Prodanovića opravdana. Naveo je primjer Srbije koja je uspjela poslije aranžmana sa MMF-om dobiti memorandum svih banaka, koje se nalaze na njenoj teritoriji, da će u periodu od dvije godine zadržati kapital i kreditnu aktivnost na njenoj teritoriji. Time je želio ukazati na značaj aranžmana BiH sa MMF-om, ne samo zbog novca, nego zbog osiguranja stranog kapitala u domaćim komercijalnim bankama. U BiH djeluje 31 banka, za dvije postoje potvrde o nepovlačenju kapitala iz BiH zbog problema, ali je neophodno to osigurati i od svih ostalih banaka na području BiH.

CBBiH je šest mjeseci prije nastupanja finansijske krize promijenila svoju investicionu politiku, te svoje rezerve prenijela u evropske centralne banke u Njemačkoj, Francuskoj, Luksemburgu i Visbadenu. Zahvaljujući toj mjeri CBBiH nije izgubila ništa od sredstava, koja se sad nalaze na sigurnom. O pitanju osiguranja depozita, naveo je da postoji inicijativa da se formira stand by fond od 50 miliona eura, kojim bi se osiguranje depozita podiglo na 50. 000 KM za što je jedini uslov da BiH izda garanciju da će, ako taj fond bude korišten, servisirati te obaveze. O pitanju stare devizne štednje, istakao je da je CBBiH fiskalni agent BiH, a ne entiteta, te da je vrijeme da i FBiH izda obveznice, te po sličnom sistemu kao u RS riješi pitanje stare devizne štednje. Istakao je da postoji mogućnost da BiH izda vrijednosne papire, ali se postavlja pitanje da li da se to sada radi zbog nedostataka sredstava i politike investitora.

Projekcija rasta GDP-a u 2008. iznosila je 5,5% U ovoj godini rast GDP-a iznosio je 3,5%, zatim je korigiran na 1,5%, a prema zadnjoj projekciji, rast GDP-a iznosio je 0%, tj. aktivnost je bila jednaka kao u 2008. godini, dok prema nekim posljednjim projekcijama, GDP iznosi -1,70%. Istakao je da u pregovorima s MMF-om određenu ulogu ima CBBiH, ali da pregovore vode državna i entitetske vlade, koje treba da se izjasne da li prihvataju uslove koji se pred njih postavljaju ili ne. Također relaksiranje situacije moguće je kroz određene izmjene zakona o bankama na svim nivoima vlasti, što je u nadležnosti vladinog sektora. Inflacija je u februaru 2009. iznosila 1,8%, te je trenutno u padu. Naveo je da su cijene nafte i hrane na niskom nivou, da je potrošnja u BiH smanjena (izvoz smanjen za 23%, uvoz za 22%), a sam prihod od indirektnih poreza je manji za 13% u prva dva mjeseca 2009. Izrazio je nadu da će 2010. godina biti godina oporavka, jer su prvi znaci oporavka od krize kad svjetske berze počinju pozitivno reagirati.

U vezi sa zadržavanjem rezerve CBBiH na 14%, istakao je da je u prethodnim odgovorima već naveo planirano smanjenje rezerve sa 14% na 12%, odnosno sa 10% na 8%, te da je ona već tri puta ranije smanjivana. CBBiH smanjivanje rezerve vrši korak po korak prateći likvidnost banaka. Ostvareni profit CBBiH u 2008. godini rezultat je poslovanja, koje se ne temelji samo na znanju, nego i na uslovima tržišta. U 2008. godini kamate su se kretale oko 4,5%, dok su u 2009. godini one ispod 2%, što, zapravo, znači da u 2009. godini nećemo uspjeti ostvariti ni pola profita iz 2008. godine. Trenutno se vodi negativna kampanja protiv komercijalnih banaka, a CBBiH pokušava preko Udruženja banaka inicirati određene akcije kako bi se banke vratile u racionalnije okvire. Smanjivanje kamatnih stopa u Srbiji pojasnio je vladinim korakom da subvencionira kamate na određene (privredne) kredite. To bi mogla da bude jedna od mjera i u BiH ukoliko postoje

raspoloživa sredstva. Fiskalno vijeće donijelo je set mjera za ublažavanje krize, koje će provesti Vijeće ministara BiH i entitetske vlade, te će se tek vidjeti njihova efektivnost. Ukazao je potrebu potražnje za dodatnim izvorima finansiranja realnog sektora, gdje je kao opciju naveo uzimanje kredita i izvan BiH, naglašavajući da je i tamo nestašica kapitala. Saglasio se s novom ulogom MMF-a kao pomagača u krajnjoj nuždi i mnogo jačim ekonomijama nego što je bosanskohercegovačka. MMF je dobio dodatna sredstva, te zaposlio nove radnike, dok je prije dvije godine bio suočen s otpuštanjem oko 30% radnika, zbog smanjenja njegovog značaja. BiH redovno servisira svoj vanjski dug u iznosu od 2 milijarde KM. Istakao je da će 2009. biti jako teška i izazovna godina, te da je na svim nosiocima vlasti odgovornost za preduzimanje mjera kojima bi se barem pokušale održati aktivnosti u BiH na prošlogodišnjem nivou.

Nakon duže rasprave, Komisija se odvojeno izjasnila o izvještajima CBBiH, te je **predsjedavajući** konstatirao da je Komisija Godišnji izvještaj i Finansijske izvještaje Centralne banke BiH za 2008. jednoglasno usvojila.

Ad. 5. Tekuća pitanja

- a) **Incijativa Saveza samostalnih sindikata BiH za donošenje Odluke koja ima za cilj smanjenje troškova ukupne javne potrošnje i uvođenje štednje na svim nivoima vlasti u BiH, zaprimljena 12.3.2009.**

Zorica Kazić, savjetnik za ekonomske poslove iz Saveza samostalnih sindikata BiH, navela je da je Glavni odbor Saveza, od momenta prvih najava otpuštanja industrijskih radnika u stalnom zasjedanju, te da je predmetna inicijativa rezultat tih zasjedanja, a upućena je Parlamentarnoj skupštini BiH, Parlamentu FBiH, Narodnoj skupštini RS-a, Vladi FBiH i Vladi RS-a. Predmetnom inicijativom Savez je predložio smanjenje javne potrošnje, putem smanjenja troškova, čija sredstva bi bila korištena za stimulaciju proizvodnje i izvoza. Savez se rukovodio principom zaštite standarda zaposlenika, te stoga smanjenje javne potrošnje nije predložio putem plaća.

Predsjedavajući Komisije naveo da se upoznao s predmetnom inicijativom koja zagovara mjere smanjenja javne potrošnje na svim nivoima vlasti, te informirao da je rukovodstvo Komisije u tom smislu za državni nivo predložilo dopunu Zakona o plaćama i naknadama u institucijama BiH po hitnom postupku, o čemu bi Predstavnički dom na sutrašnjoj sjednici trebalo da se izjasni.

Lazar Prodanović istakao je da uvažava predmetnu inicijativu, da je navedenim Prijedlogom zakona obuvaćen veći broj iniciranih mjera, dok neke predložene mjere nije moguće provesti zbog zakonskih ograničenja. Zatim je upoznao prisutne s inicijativom rukovodstva Komisije, koja je naišla na punu podršku članova Kolegija Predstavničkog doma, navodeći da se Prijedlogom zakona o dopuni Zakona o plaćama i naknadama u institucijama BiH predviđa da se do kraja 2009. za obračun plaća budžetskih korisnika za sva izabrana i imenovana lica, sve državne službenike, diplomatsko-konzularno i vojno-diplomatsko osoblje, imenovana profesionalna vojna lica, kao i imenovane policijske službenike u institucijama BiH, koji imaju koeficijent veći od 4,0 koristi osnovica iz 2008. godine. Rukovodstvo Komisije vodilo se principom da se zaposlenima u institucijama BiH, s nižim primanjima (koeficijent ispod 4) ne smanjuje plaća. Ministarstvo finansija i trezora BiH tek treba da utvrdi ukupne efekte uštede, a za PSBiH je to više od 500. 000 KM godišnje. Naglasio je da je zakonski prijedlog podnesen na razmatranje po hitnom postupku, te da se nada da će mu Predstavnički dom dati nepodijeljenu podršku. Svjesni cjelokupne situacije u BiH te mogućeg aranžmana s MMF-om, istakao je da je, ako Vijeće ministara BiH predloži sveobuhvatnije mjere za smanjenje javne potrošnje od već predloženog, Komisija to spremna razmotriti.

U raspravi je naveo da bi sredstva koja bi se uštedila usvajanjem dopune Zakona o plaćama i naknadama nadomjestila nedostajuća sredstva u budžetu institucija BiH, jer će oko 15 institucija BiH imati problem s nedostatkom sredstava do kraja godine, a eventualno preostala sredstva bi se, ako postoji zakonski okvir, raspodijelila na niže nivoe vlasti.

Bajazit Jašarević naveo je da predmetna inicijativa Saveza samostalnih sindikata BiH treba da bude platforma za daljnji rad rukovodstva Komisije s Ministarstvom finansija i trezora BiH u pripremi prijedloga koji mogu dobiti jednoglasnost i parlamentarnu većinu.

Predmetnu inicijativu nije moguće odmah realizirati, nego ona zahtijeva kontinuiran rad po predloženim mjerama, te bi rukovodstvo Komisije s članovima Kolegija Doma trebalo razgovarati o svim predloženim tačkama, a predstavnici Saveza samostalnih sindikata trebalo bi da budu upućeni u njihov rad kroz kontak s rukovodstvom Komisije. Istakao je da uštedena sredstva nije moguće slijevati u fondove za poticaj privrede u situaciji kada budžetima nedostaje sredstava za opstanak. Istakao je potrebu da vlada pri projekciji budžeta propisuje visinu osnovice za obračun plaća na početku svake godine, što trenutno nije zakonsko rješenje u BiH.

Adem Huskić podržao je sindikalnu ideju o smanjenju javne potrošnje, čija bi se ušteda konačno plasirala za stimulaciju proizvodnje i izvoza. Pitao je predstavnika Saveza samostalnog sindikata BiH da li je izračunato kolika bi se ušteda ostvarila ukoliko bi se predložene mjere usvojile na svim nivoima vlasti. Kako taj precizni podatak Savez samostalnih sindikata BiH nije utvrdio, predložio je da Vijeće ministara BiH sačini analizu o kojem iznosu sredstava bi bila riječ kad bi se predmetna inicijativa primijenila na budžet BiH. Podržao je Prijedlog zakona o dopuni Zakona o plaćama i naknadama u institucijama BiH, mada smatra da postoje i drugi kvalitetniji modeli za smanjenje javne potrošnje.

Predsjedavajući Komisije odgovorio je da u obrazloženju predmetne inicijative stoji neformalna procjena da bi se ovim mjerama umanjena javne potrošnje na svim nivoima prikupilo oko 200 miliona KM.

Salko Sokolović naveo je da je Klub poslanika SDA preko Zajedničke komisije za administrativne poslove predlagao mjere za smanjenje potrošnje, koje su konciznije i obuhvatnije i više slične zahtjevima predmetne inicijative, nego predložena dopuna Zakona o plaćama i naknadama u institucijama BiH. Podržao je inicijativu rukovodstva Komisije o predlaganju zakonske dopune, uz rezervu da se taj zakonski prijedlog mogao kvalitetnije i obuhvatnije sačiniti.

Velimir Jukić podržao je sindikalno udruživanje, te ukazao na važnost dijaloga između vlasti i tog sektora, ali je izrazio oprez u vezi s realnošću zahtjeva. Prijedlog zakona o dopuni Zakona o plaćama i naknadama u institucijama BiH smatra realnim i prihvatljivim.

Savo Erić podržao je inicijativu u vezi sa zakonskim prijedlogom, te upitao predlagača gdje bi uštedena sredstva trebalo da budu usmjerena.

Sekretar Komisije
Željko Kosmajac

Predsjedavajući Komisije
mr. ecc.sc. Sadik Bahtić